

金

石

萃

編

嶽多沸騰征戍匪遑晏祿去公室政行私門天網於是  
不恢法輪由其暫息樂崩禮壞寧復云乎遂令像教凋  
殘梵宇淪落歇滅之望雖異歎於蕪城悵惺之遊未殊  
悲於火宅若行若坐每是思惟於戲

我唐德淳

仁洽歲無荒札邊盡封守鴻儒碩秀繼踵於口臺赤鳥  
朱鷹接翼於祥府仍精想道意銳念眞寂昇乾用尊於  
九五世界載廣於三千有若大比丘上座釋法震俗閭  
氏也寺主智琬俗楊比也德祖種美於魏公績伯見賢  
於太傅行祛五濁心清六塵登於仁壽之路超以閻浮  
之境都維那曇一俗賈氏也朝廷獲寵恃外戚而相國

而開談鴈聽不去坐銀牀而入定鳥乳何驚衆比丘釋  
惠琬彥莊嘉口法琇法會法海道林口超談論曇暉希  
逸惠靜等竝庇影禪林凝情定水已除疑網共振頽綱  
弥天揆天之才詞光麗藻東山北山之部義了精微力  
役將候於子來制作口符於造化口是或杖錫或乘杯  
踰嶮槎木以攸往泳淙編桴而利涉途窮理迫便作是  
念言順志柔而爲譬喻喜檀施之衆以大伽藍罄衣鉢  
之餘以崇輪奐事惟靡盬誠無怠違諦聽則被物如雲  
降伏則偃人猶草查供霧護輻輳遷碎然後詳共工之

庶費審班匠之施巧經之營之不盈不縮珠貝之寶非  
獨漢皋松石之材寧專岱剛再加剗重肆彫礲勢戢  
音以攢倚狀支離而分赴造宮觀於天路日月出入於  
其閒浮梁柱於星躔烟霞棲洽於其表千櫨競紮大鵬  
垂而欲飛百拱爭高翔口仰而何逮松搖麀尾直對香  
爐巖聳鷲頭下臨禪窟長廓竒篠曲榭周流叢塔珠草  
而未名倒井瑞蓮而幾色璀璨粲粲金碧炯晃而燁亂  
煒煒煌煌丹青炳煥而昭彰映以甘泉之玉樹隱以崑  
崙之銀闕北據竹箭激波浪以成池南拒荆衡口峯巒  
以層閣塵飛劫石似拂雲衣風觸鳴琴乍傳天樂故知

功高由志業廣由勤功成而其頌可宣業就而其名可著將持聖勳在勒豐碑陵谷可遷相好常住敢憑此義不朽斯文銘曰

皇矣能仁空卽是真青蓮矚目丹菓開層恒沙世界累劫微塵作礼圍遶誰之與鄰其一若日比丘仁精行脩究

竟微妙洞達靈幽言驚黑鼠先乘白牛欲設方便思口其柔其二聲高道口業尊惠口禪林永邁寂路忘返德洽

雲搖信行風偃將植龍樹先經鹿苑其三爰始結搆廣茲

口字鐸迴風吟口口雲聚叢倚口立杈牙邪豎壁露銀

泥繩交金縷其四遠瞻迢遰迴望崔嵬文以粟玉藻以玖

瑰彫堯鳳翥畫壁龍來自自然風角何必天台其五雲蔚霞

爍赫弈彰灼下極宵冥上肆寥廓瑤林瓊樹蕙樓芸閣

海變成田此其如昨其六

大唐開元廿五年歲在丁丑四月口巳廿八日壬申

口

殿內西鋪大像主上柱國劉知音

碑云臨高寺者西魏口書口劉謙之宅捨充寺焉處  
高臨下茲以建号其文甚工麗字亦姿致可觀惟寫  
葺爲蒼海爲兼騰爲濤戍爲戍閭爲閭奐爲奐煥爲  
煥最爲紕繆餘文亦多別體云輻輳連碎出漢書揚

雄賦云輻輳不絕孟康曰輻輳連屬貌如淳曰音雷  
虛實漢人俗字也古無喻字以譬諭爲譬喻猶用古

字

中州金石記

按臨高寺在閔鄉縣城東南二十里河南通志不  
詳建寺之緣起但載明左守忠詩有云青松閱世  
風霜古翠石題名歲月賒卽謂此碑也碑云西魏  
口尚口劉謙之宅捨充寺焉劉謙之附見南史劉  
康祖傳乃劉宋元嘉時人傳云康祖彭城呂人康  
祖伯父簡之簡之弟謙之好學撰晉紀二十卷位  
廣州刺史太中大夫此碑云西魏當是別一人閱

鄉俗省作

縣地兩漢魏晉皆謂之湖縣至北魏孝

文太和十一年置陝州恒農郡而湖縣遂謂之湖  
城縣讀史方輿紀要云西魏大統四年魏主自洛  
還關中留闕鄉蓋湖城縣之鄉名也謝中丞啟昆  
西魏書大統四年秋七月東魏將侯景等圍洛陽  
帝與安定公宇文泰東伐九月車駕至自東伐所  
謂留闕鄉者卽此時也然則闕鄉之地六朝以來  
總爲魏有碑云西魏信爲可徵南史所載劉謙之  
非卽捨宅之人明矣撰文者常允之次行承奉郎  
前行商州參軍下泐三字是其名此人當是篆額



者而云舍弟乃允之之弟也又次行弟字上勛一  
字當亦是舍字下云文林郎吏部常選演之書兄  
稱其弟曰舍弟初見此碑碑書恒河世界達諱作  
廿界廿八日壬申則朔日乙巳碑蓋泐乙字也

進法師塔銘

石橫廣二尺八寸五分高二尺  
二寸二十七行行二十字正書

大唐大溫國寺故大德進法師塔銘 井序

太子司議郎陳光撰

開口寺沙門智詳敬寫

法師法名進俗姓高氏渤海蓆人也自錫土派姜而世

官懿德姓煤代□詳之矣法師天縱淑靈性與眞粹越  
在嬰弱已現殊表每□□有侘祭之心□□□□娶規  
以笈□髫卅就學便耽習眞典年始□歲□誦萬言□  
□十二部經春秋廿而畢□□□□多劫□慧異於今  
□哉文明年中占□□而□□□仙遊山□將□超  
絕世□經行於□□□中□□□菩提樹下三明所照  
五蘊皆空□潛□□□□播諸方□衆□爲□著禪  
味利益□身不□□□□門津梁萬物□菩薩□用如  
來心大□群迷將登正覺歸依者咸廣鑽仰者日多始  
遷香積□□終□溫國大德□□由已牽□在□衆藉

網維□□□□□寺主頃之□□上座□餘之心雖  
無□□□□□爲所應終□□□濟□□□□□□  
□□□□□涅槃仍經□□□身世如閱□□□□鳴  
呼始□師遘疾之初□□□□□□□杉雲□□□  
□□所及大□道俗省問三百餘人□□異香□□  
樂髣髴至□□感□□□測粵丙子歲開元廿四年八  
月□□終□□十五日寔茲隧禮也弟子乘侶□□  
息□□□□□□□諸比丘比丘尼□□□□□  
□□□密□□□□□□□毒不可勝數□□爲天地  
長□人代遷□□□□□刊記易播徽烈□□□□乃銘之

曰

□□□□相湯薄滅□寂□乃爲樂如如我師淨無著  
音容一去長冥寞

開元廿五年歲丁丑七月癸酉朔八日庚辰建

此太子司議陳光撰僧智詳書磨泐僅存形似然其

書法亦是習登善者

石鑿  
鐫華

按書碑者沙門智詳不云敬書而云敬寫以寫爲  
書他碑未見寫有磨鈔之義本於古諺所謂書三  
寫魚成魯帝成虎也

無畏不空禪師塔記

碑橫廣二尺六寸高二尺四寸四分三  
十五行行二十二字正書在咸陽縣

西山廣化寺三藏無畏不空法師塔記

大唐開元二十三年三藏無畏卒春秋九十有九詔鴻  
臚丞李現監護喪事塔于龍門之西山廣化寺藏其全  
身畏本釋種甘露飯王之後以讓國出家道德名稱爲  
天竺之冠所至講法必有異相初在烏茶國演遮那經  
須臾衆會咸見空中有毘盧遮那四金字各尋文排列  
久之而沒又嘗過龍河一托驢負經沒水畏懼失經遽  
隨之入水於是龍王邀之入宮講法不許彼請堅至爲  
留三宿而出所載梵夾不濕一字其神異多類此○是

歲三藏不空於師子國從普賢阿闍黎求開十八會金剛灌頂及大悲胎藏建壇之法其王一日調象俄而群象逸莫敢禦之者不空遽於衢路安坐及狂象奔至見不空皆頓止跪伏少頃而去由是舉國神敬之○論曰自大教東流諸僧間以神異助化是皆功行成熟契徵心源自覺本智現量發聖絕非呪力幻術所致也殆自東晉尸利密已降宣譯祕呪要其大歸不過祀鬼神驅邪妄爲人禳災釋患而已其間往往不口無假名比丘自外國來挾術驚愚有所謂羅漢法者正么膺邪術下劣之技亦猶道家雷公法之類也茲豈高道巨德宏禪

主教者齒哉及開元中西域金剛智無畏不空三大士始傳密教以元言德祥開佑至尊卽其神功顯効幾與造化之力均焉故三大士雖宏密教抑本智現量發聖與當慨資治通鑑稱真觀中有僧自西域來善呪術能令人立死復呪之使蘇太宗擇飛騎中壯者試之皆如其言因以問傅弈弈曰此邪術也臣聞邪不干正請使呪臣必不能行帝命僧呪弈弈初無所覺須臾僧忽僵仆若爲物所擊遂不復蘇此恐好事者曲爲之辭何則若使果有是則僧非真僧呪非真呪正謂邪術耳固不足以及張吾教之疵也矧萬萬無此理向使彼能自西域

遠至長安厭術能死人而復蘇乃不暇自衛其身對常  
人無故而僵死雖兒童莫之信也又當是時三大士者  
雖俱未至若京城大德僧惠乘元琬法琳明贍諸公其  
肯坐觀絕域僞僧破壞教門不請峻治乃留帝命傅弈  
辨耶佛制戒律雖春蹊生草猶不許比丘踐之恐害其  
生况說斷人命呪傳于世乎故予謂好事者曲爲之辭  
斷可見矣

開元二十五年歲次丁丑仲秋八月吉旦刊

右碣在縣東卅里瑤店本塚前寺壁字弱不侔當年

文無可疑或原石殘毀後人易之者俟考

咸陽金石遺文



右塔記在咸陽原不空禪師墓前作于開元二十五年書法似顏平原敘述無畏過龍河一駝負經入龍宮講法留三宿又師子國象奔逸見無畏跪伏多與張郢所撰碑合又辨西域僧奏咒傳奕事曰此好事者爲之詞若果爾則邪說不足以疵吾教也佛制戒律不踐生艸况咒斷人命乎其文可觀錄之

金石錄補

文稱不空于師子國從普賢阿闍黎求開十八會金剛灌頂法又稱一日調象俄而羣象奔逸不空遽于衢路安坐象至皆頓止跪伏少頃而去二事竝見嚴郢所撰大廣智不空三藏碑中故說者謂此無畏不

空與大廣智不空卽是一人按大廣智不空以大歷  
中卒于興善寺此卒于廣化寺爲開元二十三年時  
地並異不得合而爲一考開天傳信錄云無畏三藏  
初自天竺至所司引謁元宗元宗謂曰師來欲何方  
休息無畏曰臣在天竺時聞西明寺宣律師持律弟  
一願往依止元宗可之因居焉據此是另爲一人又  
按大廣智不空本無無畏之名其起塔卽在本院此  
則瘞于龍門之西山地屬咸陽爲非一人更無疑

金石記

右三藏無畏不空法師塔記無畏者如來季父讓位

入道開元初至京師文苑英華載李華所撰東都聖善寺無畏三藏碑卽其人也與嚴郢撰碑之三藏不空和尚各是一人但據李碑無畏初無不空之號據嚴碑不空亦無無畏之名此記乃合而爲一一可疑也據李碑無畏終于東都聖善寺葬于龍門西山而銘詞有伊水西山冥冥元室之語則是洛陽之龍門不當塔于咸陽二可疑也且檢此記前一段稱三藏無畏後一段稱三藏不空最後又稱金剛智無畏不空爲三大士則亦未溷而爲一旣係兩僧何緣同在一塔三可疑也記末題開元廿五年秋八月刊其時

無畏已歿而不空乃卒于大歷中時代乖舛四可疑也此刻昔人未有著錄者書法亦俗其爲後人妄託

無疑

潛研堂金石文跋尾

記云大唐開元二十三年三藏無畏卒春秋七十有九詔鴻臚丞李峴監護喪事塔于龍門之西山廣化寺藏其全身舊唐書李峴傳稱峴樂善下士有史幹以門蔭入仕按此記詔鴻臚丞蓋其門蔭之資也記後有論引資治通鑑真觀中有僧自西域來善咒術云云蓋記石已毀爲宋人重刻非獨載司馬公書并仁宗諱已避之矣近人仍目爲唐刻誤也貞觀作真

觀避仁宗諱使然

按金堂石跋

金石錄卷八十二

十一

按此碑之誤甚不可解文中所敘種種錯謬又引資治通鑑一條顯係宋以後人之崇信咒術者刻記于廣化寺僧塔前然末行又題開元二十五年歲次丁丑仲秋八月吉旦刊不署記者姓名唐碑未嘗有稱其日爲吉旦者則并此年月亦爲後人僞託無可疑者碑題無畏不空法師塔記似以無畏不空爲一人文稱西域金剛智無畏不空三大士則無畏不空是二人王圻續文獻通考仙釋考名釋卷內此三大士各有傳云三藏金剛智西域

八木王種出家及聚東土元宗見之大悅館于大  
慈恩寺當合祈雨智結壇圖一僧佛像約開眸卽  
雨閱三日像果開眸斯須而雨所至必結灌頂道  
場弟子不空傳其教寂後賜諡灌頂國師無畏三  
藏天竺人讓國出家元宗嘗夢見之至果如夢館  
西寧寺後令祈雨持鉢水以小刀攪之卽有微雨  
浮沈鉢面俄而大雨滂日又嘗令祈晴畏捏泥媪  
五軀作梵語咒之若斥罵者卽刻而禱不空胡僧  
也居興善寺嘗至師子國羣象奔逸莫能禦之不  
空端坐路衢象皆頓止俯伏少頃而退元宗于便

殿令與方士羅思遠較術遠持如意向之言論次  
不空就取如意投諸地令思遠舉之思遠饒力不  
能舉帝擬自取不空笑曰三郎彼如意影耳因舉  
手中如意示之思遠欽服而罷凡禱必張繡座手  
持木神神能自立口吻瞬動所禱可奪造化朝野  
奉之如神此三大士皆以咒術行于元宗朝卽碑  
所云始傳密教以元言德祥開佑至尊神功顯効  
與造化之力均者是也所謂密教者卽是咒術釋  
氏以咒爲祕密眞言也按不空得索菩薩經見于  
開元釋教錄及譯經三藏  
聖教者甚多故番僧名不空者亦衆此不空蓋西  
域之種別爲一人以持咒爲密教師亦有所翻經

元見于今碑又首敘無畏之卒及其道行次敘不

空道行原分無畏不空爲二人後列總論乃敘三

大士名而繼以貞觀中傳奕事事詳資治通鑑貞觀十三年之末

標題則總謂之西山廣化寺三藏無畏不空法師

塔記文與題不合如此釋氏僞碑本不足錄今以

其爲諸家所著錄姑附存之碑書托馳負經沒水

托馳疑卽乘馳借用字

### 比丘尼惠源誌銘

石高二尺五寸廣二尺二十四分二十七行行二十七字正書

大唐濟度寺故大德比丘尼惠源和上神空誌銘 并序



京兆府倉曹參軍楊休烈撰

姪定書

嘗聞見性爲本知常曰明幽探靈珠相付法印必將有  
主人無聞言故如來立三世之事也大師諱惠源俗姓  
蕭氏南蘭陵人也曾門梁孝明皇帝諱瑒 皇中  
書令尚書左右僕射司空宋國公父諱錢給事中利州  
刺史紛綸歲蕤奕世名家原大師之始誕也惠音清越  
閉氣冲亮稟天眞於太和集神祐於純嘏及數歲後養  
必申敬動皆合理發跡契道出言有章屏金翠而室其  
繁華絕葷羶而割其嗜欲超然曠勝但思出家

天鑒孔明精心上感年廿二

詔度爲濟度寺尼

如始願也受戒和上

寺大德尼

道之崇也

磨關梨太原寺大德律師薄塵法之良也迺延師立證  
登壇進律僧夏歲潔戒珠日明奉以周旋不敢失墜初  
大師纔至九歲遵先大夫之酷甘有七執先夫人之憂  
皆泣血茹哀絕漿柴毀古之孝子烏足道哉每秋天露  
下衰林風早棘心樂樂若在喪紀不忘孝也亦能上規  
伯仲旁訓弟姪嗶嗶闔門俾其勿壞則天倫之性過人  
數級夫其內炳圓融外示方便恂恂善誘從化如流亦  
猶師子一吼魔宮大墮則感激有如此者行住坐卧應

必皆空慈悲喜捨用而常寂黃裳元吉清風穆如則鏡  
鏡有如此者後遇高僧義福者常晏坐清禪止觀傳明  
殊禮印可又有尼慈和者世尊之識知微通神見色無  
礙時人謂之觀音菩薩嘗於大眾中目大師曰十六沙  
彌卽法華中本師釋迦牟尼之往号也非大師心同如  
來孰能至于此而更精承密行親佩耿光十數年間演  
其後事他日大師厭世示疾以開元廿五年秋九月二  
日從容而謂門人曰死生者天之常道身沒之後於少  
陵原爲空遷吾神也言卒右脇而卧怡然歸寂始知至  
人不滯於物矣嗚呼天喪門人曷以仰曷以律時大師

享年七十有六卽以十一月旬有二日從事于空道理  
命也志無彊之德旌不刊之典不亦可乎銘曰

猗那明行 足不復還 至人去兮 逍遙天地之間

九月廿有三日鐫

碑云師姓蕭氏太父諱瑀父鈇唐書稱瑀好浮屠法  
閒請捨家爲沙門比邱尼法願其女也而惠源又繼  
之史之言爲不虛矣書本傳瑀有子銳而不及鈇定  
瑀之曾孫終太子少師

關中金  
石記

右濟度寺尼惠源和上神空誌京兆府倉曹參軍楊  
休烈撰姪定書惠源宋國公蕭瑀之孫女父鈇給事

中利州刺史宰相世系表作鉞不云爲利州刺史者  
脫誤也文云曾門梁孝明皇帝稱曾祖爲曾門未詳  
其義定官至太常卿鉞之孫也姪者對姑之稱後世  
昆弟之子於世父叔父亦稱姪者乃相沿之失顏魯  
公於伯父元孫稱姪男未免蹈俗若定之稱姪爲合  
于古矣浮屠之法然骨而瘞之于塔此獨云神空者  
蓋墓而不塔也誌稱惠源將死謂其門人曰身沒之  
後于少陵原爲空遷吾神也又稱以十一月旬有二  
日從事于空遵理命也理卽治字學釋氏者猶不忍然如  
之慘而不用其法而民俗乃有惑于火葬者其亦無

是非之心矣

潛研堂金石文跋尾

誌載曾門梁孝明皇帝按段行琛碑曾門德溶蓋以曾祖爲曾門唐人多有此稱矣誌題惠願和上証之通俗編引廣異記大歷時某寺尼令婢往市買餅見朱自勸問云汝和尚好否又云聞汝和尚未挾纊今附絹二疋與和尚作寒具婢承命持絹授尼則唐時尼亦稱和尚又見于此誌且在大歷前翟晴江未採入也

授堂金石跋

按惠源爲蕭瑀之孫女蕭武之女其姑法願亦出家濟度寺爲尼有誌銘錄于前法願卒于龍朔三

年惠源卒于開元廿五年春秋七十六推其生在

龍朔二年是法願卒時惠源年甫二歲也法願誌

但云梁武帝之六葉孫司空宋國公第三女此碑

則云曾門梁孝明皇帝大父諱瑀皇中書令尚書

左右僕射司空宋國公父諱欽給事中利州刺史

孝明皇帝者後梁宣帝嘗之子梁自元帝承聖三

年江陵被陷次年晉安王方智卽位于建康梁王

嘗稱帝于江陵臣于西魏是爲宣帝死後子歸明

位是爲明帝蓋在陳文帝天嘉之世矣

嘗字理孫  
梁武帝之

孫昭明太子統之第三子周  
保定二年堯太子歸嗣位碑書皇朝不用朝字

唐碑往往如此殆省文也新唐書蕭瑀傳瑀字時  
文後梁明帝子高祖入京師招之瑀郡自歸授光  
祿大夫封宋國公王世充平進尚書右僕射遷左  
僕射貞觀初拜特進太子少師復爲左僕射晉王  
爲皇太子拜太子太保同中書門下三品加特進  
卒後贈司空諡曰肅改諡貞褊碑不稱諡諱其惡  
也武宰相世系表作鉞瑀第三子官給事中不云  
利州刺史者表之略也書碑者蕭定惠源之姪傳  
稱定字梅臣瑀曾孫以蔭起家陝州參軍事累官  
太子少師碑不自署其官想猶未仕時也碑末小



字書九月廿有三日鑄惠源以九月二日卒十一月十二日葬而鑄碑在九月蓋卒後兩旬未葬而碑已具矣

周尉遲迴廟碑

碑連額高一丈三寸廣四尺五寸八分二十四行行四十七字隸書額題周太師蜀國公尉遲公神廟碑十二字篆書今在彰德府

前華州鄭縣尉口伯口敘

祕書省校書郎顏真卿銘

蔡有鄰書并陰

有周上柱國蜀國公河南尉遲迴字居口代人口口口

口祖口因部立口口雄荒服父侯兜尚太祖口昌樂大  
公主贈太傅長樂郡公秉操中和率心純口無命早口  
口一歲而口口口口口神口口口口乾元昴宿之社得  
雲中金陵之氣口昌樂胎教之德閱長樂庭訓之旨觀  
時俯仰與道周口大統初仕魏散騎侍郎歷大口口帳  
內都督尚魏金明公主封西口縣侯亳社未遷天人主  
饋真寶載祀茅土增封四口進爵口公轉車騎將軍領  
侍中尚書僕射珮符乘璽劍橫重紱元戎口警端揆允  
釐十六年拜大將軍時侯景詐梁蕭紀口口委公以上  
國口口口口方之益假公以垂天之翼虞殷中之翰公

□□是承廟筭出銳師張我軍三覆之勢踵敵人七擒

□□□□庸蜀□□皆□□公兼益梁□□八州諸軍

事益州刺史公孝思不匱色養有遠長公主春秋既高

西南夷威懷允洽自家刑國重□温清之詔□□書□

仍頒袞冕之錫旌其伐也改□蜀郡公中領軍綱弟因

兄寵安固公順子策父勳豈獨長安置□□□□成都

□□□□周之興也換小宗伯督隴右十二州后稷

仕虞且尊君命伊尹去□□虧臣節陶唐之美無易至

公進公蜀國□邑萬戶摠□□文康十四州軍事累遷

大司馬冊太師加上柱國師傅之地非賢不居軍國之

重唯□□□俄拜大右弼□□大□□將□俾安危授  
相州總管宣皇屢駕周鼎方移晉京上流非無陶侃魏  
廷舊□尚有王陵是年京師將徵公公□隋□□□辭  
不受代乃自稱大總管承制署官司諸呂擅朝幾亡劉  
氏新都納女竟覆漢宗□子魏安□□東之□也公綠  
巾白□□背城請戰□□既潰則登樓自裁公志匪圖  
全誓將死難不憚□□以勸事君恒畢心而稟悔因見  
危以授命嗚呼□在□□位爲元□生不敢齒歿有□  
事史之闕文從古也公凡仕二代□九朝內設官師歷  
職三十四外建□伯□□□□□□邑□□□忠不

辱隋節能□上唯幼孫獲□而門子從辜唐武德中朝  
制改葬□終追舊□□□□ 表墓□□ 天澤

流於異世開元丁丑歲 上選建衆哲輯寧庶□相州

刺史張公嘉祐元□國河東□□□□□□□□兩

□廟瑚璉立朝則兼掌□□佐郡則預參師律至於是

邦也教以肅□以清起忠貞之廟制□□□□□□□

□□□□□稱多□公曰匹夫匹婦強□者猶能爲厲

况蜀國公言足昭行可則大象之際獨爲純臣毀□□

□□□□□□□□□字於□□□千石旣□□□

闕修殷薦其取戾也宜哉我是用發私藏之俸則□宮





平郡公勤日汝親當矢石吾已□□□□□□□□□□  
□□周命荅之其奮劔大呼止之不及而卒三軍慟哭  
夷夏慕之荀息率死□奉君傳□□□□□□□□□□  
□有撥亂反正崇德報功□式忠貞之封更優賜贈之  
禮以稱教甫沒代垂仁□□□□□□□□□□若名臣試粵  
天下師通禮樂以布和撫幽明以靖厲歷典凡百獨惟  
張公曰嘉祐相國河□□□□□□也汾吐金獄生雲氣  
不然豈光贊紫文俾五星同□□□丹禁而三柱克  
□□□□□□□□□□於□□由是殿中受略鄴下爲  
憂俗隱咸柔□□必舉□我先正勤君死□□□□□



□□□□直書副之誠請軒綴斯翼庭植有幽儼惟肖  
以赫靈肅應虔而麗福屬夏正□□□□□□□□□□  
羞告期□焚蕭而片雲飛蓋整策而沛澤隨車霽後宵  
初天清月滿忽有雙鶴□□□□□□□□□□而去公  
□□侍御史環賦膏雨美其事鄴縣主簿郭垠以爲鶴  
者□□聞天□□□其□□□□□□既而秋作將害黍  
盛公祈以巫應時晴朗飛蝗自魏蔽日而西□□□誠  
□□□□□□□□□□故嘉茂歲則大孰百姓歌  
曰張公張公清且明蝗蟲避境□□□巫瞞□雨□□  
□□□□□□□□□公每涂不常叱俗忤政閤閤引咎

而異自銷京兆理劇之能□□博物□□□□□□  
□□□□知志□性正而神不違忠以奉法法一而人  
不犯神人從天地當此其□□魁□□□□□□□□  
投虛□象著于述職奇士傳□詳士良忝沐家聲徒如  
祖德□□□□□□□□□□□□□□□□□□□□□□  
紀諸貞□

尉遲迴碑成伯瑛撰世以蔡有鄰書特貴其敘迴事  
與周史略同然迴之死節不得顯方周之興迴已為  
蜀國公矣隋公總政天下冤憤鬱結不得其死宜其  
出靈響以自見也唐世說自迴之死而相州都督死  
者前後相繼張嘉祐既治事夜整冠危坐迴自西廡

出謂其遺骸尚存願得身葬前牧守驚悸逝非所害也指其女子曰同瘞於此明日嘉祐發得改葬既夕出謝嘉祐以聞請置廟歲時血食今考周紀韋孝寬既平鄴城則移州守安陽至於碑則謂武德中朝制改葬逮開元丁丑張嘉祐問俗郡言多崇公曰勣相公獨爲純臣闕修殷薦其取戾宜哉觀此自是武德改葬至嘉祐則廟而祀之矣亦不因詔行也廣川書跋

按碑題銜前華州鄭縣尉闕伯瑛敘祕書省校書郎顏真卿銘蔡有鄰書并陰考伯瑛敘魯公爲銘是一文以二人兼爲之唐賢多此體惟魯公署祕書省校

書郎新舊唐書本傳皆未及是爲失紀矣碑云尉國  
公河南尉遲迴字居羅代人也河南舉其郡望蓋太  
和十九年詔遷洛人死葬河南不得還北於是代人  
南遷者悉爲河南洛陽人碑所著是也碑書迴歷官  
大統初仕魏散騎侍郎歷大丞相帳內都督北史不  
著其官周書亦脫散騎侍郎碑云封西都縣侯北史  
不書縣字周書亦脫此封爵碑云進爵爲公轉車騎  
將軍領侍中尚書僕射北史周書並云遷尚書左僕  
射兼領軍將軍碑云公兼益梁十八州諸軍事益州  
刺史周書作益潼十八州北史亦作益潼惟云十二

州三年加督六州通前十八州則督十八州非平蜀  
一年事碑與周書不如北史之審碑云周之興也授  
小宗伯督隴右十二州進蜀國公總秦渭文康十四  
州軍事累遷大司馬周書全略此文北史作六官初  
建拜小宗伯與碑言周之興也授小宗伯同及孝閔  
帝踐祚遷大司馬尋以本官鎮隴右是由遷大司馬  
出鎮非小宗伯矣碑蓋依北史而參用他書傳故微  
有異余備錄之以俟考焉碑稱中領軍綱弟因兄寵  
綱見北史廢帝立齊王仍以綱爲中領軍故碑亦稱  
之按河朔訪古記尉遲公廟碑彰德路城中畫錦

今驗石刻良然趙德甫但以爲顏公換者考之未詳

爾

潛研堂金石文跋尾

按東觀餘論金石續錄作成伯璵撰非今碑在府城

北門內下截多不可辨金石志入臨漳誤

中州金石考

迴周書有傳碑記迴官較詳與史稍異可以參考碑

又云唐武德中朝制改葬口終追舊本傳云武德中

迴從孫庫部員外郎耆福上表請改葬朝議以迴忠

子周室有詔許之卽其事也下述開元丁丑歲相州

刺史張公嘉祐立廟之事有口稱多崇云云字多剝

蝕廣川書跋載其碑又引唐世說載張嘉祐發掘得

迴遺骸備衣衾棺器禮葬以事聞上請置廟有詔褒  
異云云事又見尚書故實今按之本傳及碑迴之改  
葬在武德時以從孫者薦表請則非嘉祐改葬明也  
後人特因此碑多崇之說從而附會成之亦可見唐  
人小說類皆造作事端非其實矣蔡有鄰者卽杜甫  
李潮八分小篆歌所稱尚書韓擇木騎曹蔡有鄰也  
廣川書跋又稱此碑當與鴻都石經相繼信不虛美  
金石略有蔡有鄰八分書尉遲迴廟碑并碑陰未詳  
又有顏真卿周太師蜀國尉遲公廟碑云在相州蓋  
誤以撰銘爲書碑也 碑陰爲迴族孫士良述張嘉

祐德政之美意感其立廟爲著于碑耳亦察有鄰書

中州金

石記

按碑云有周上柱國蜀國公河南尉遲迥字居口

代人下云因部立口口雄荒服周書尉遲迥傳字

薄居羅代人也迥之字碑無薄字與史異傳又云

其先魏之別種號尉遲部因而姓焉

北史  
傳同

魏書官

氏志西方尉遲氏後改爲尉氏通志氏族略尉遲

氏與後魏同起號尉遲部如中華之諸侯國孝文

改爲尉遲氏兩書詳略不同皆可補碑之闕兩唐

書尉遲敬德傳稱敬德朔州善陽人則又不與迥



同系敬德有碑見前碑又云父侯兜尚太祖口昌  
樂大長公主贈太傅長樂郡公傳不書贈官爵而  
碑所泐字據傳則爲太祖姊此所稱太祖當是西  
魏孝武帝謝中丞西魏書但載孝武帝妹馮翊公  
主而不載其姊昌樂大長公主碑又云公大統初  
仕魏散騎侍郎歷大口口帳內都督尚魏金明公  
主封西口縣侯周書傳云公主爲魏文帝女而不  
書迴官散騎侍郎碑所泐字乃大丞相及西都縣  
也其初封縣侯進爵爲公周書並略北史傳則云  
拜駙馬都尉封西都侯大統十一年拜侍中驛騎

大將軍開府儀同三司進爵魏安郡公碑云轉車  
騎將軍領侍中尚書僕射十六年拜大將軍北史  
則云十五年遷尚書左僕射兼領軍將軍餘與碑

同北史碑云時候景詐梁公承廟筭出銳師兼梁

益口口八州諸軍事益州刺史北史云侯景渡江

梁元帝鎮江陵請修隣好其弟武陵王紀在蜀稱

帝元帝大懼移書請救乃以迴爲大都督益潼等

十二州諸軍事益州刺史三年西魏加督六州通

前十八州諸軍事周書北史又云六官初建拜小

宗伯周孝閔帝踐阼進位柱國大將軍以平蜀功

改封寧蜀公遷大司馬武成元年進封蜀國公周傳

略碑則云改封蜀郡公而無寧蜀公餘官封俱敘

在後而於改封蜀郡公之下云中領軍綱弟曰兄

寵安固公順子策父勳据周傳云以平蜀功封一

子爲公北史則云封一子安固郡公後又云次子

順以平蜀公授開府安固郡公周傳北史又云

弟綱字婆羅少孤與兄迥依託舅氏此語迥碑大

統十四年進爵平昌郡公廢帝立齊王以綱爲中

領軍總宿衛事周書語與碑合碑云督隴右十二

州進蜀國公總口口文康十四州諸軍事北史云

除秦州總管秦渭等十四州諸軍事隴右大都督

與碑不同

周書不載

碑云俄拜大右弼□□大口□北

史云宣帝卽位以迴爲大右軍轉大前疑

周傳但云大前

疑碑泐前疑二字周時仿尚書大傳前疑後丞左

輔右弼之制因有大右弼大前疑之官名北史作

大右軍者誤也碑云授相州總管宣皇晏駕周鼎

方移是年京師將徵公公辭不受代乃自稱大總

管承制署官司□子魏安□□東之□也公緣巾

白□背城請戰□□旣潰登樓自裁北史云出爲

相州總管宣帝崩隋文帝輔政令迴子魏安郡公

惇齊詔以會葬徵迴尋以韋孝寬代迴爲總管迴  
謀舉兵留惇不受代集文武士庶等登城北樓而  
令之自稱大總管承制署官司衆數十萬隋文帝  
于是徵兵討迴卽以韋孝寬爲元帥與惇戰惇大  
敗迴與其子惇祐等別統萬人皆綠巾錦襖號曰  
黃龍兵孝寬等因兵擾乘之迴衆大敗上樓乃自  
殺惇祐等東走青州未至開封郭衍追及之爲所  
獲周傳惟惇等東走并追獲之不言青州爲異餘  
與北史同至惇等之東走碑在迴背城請職之前  
傳在迴自殺之後此則碑傳互異也迴不應隋文

之徵而舉兵以効忠于周雖敗猶榮碑載甚略故  
据北史以補所未備

金石萃編卷八十二終

金石萃編卷八十三

賜進士出身 誥授光祿大夫刑部右侍郎加七敘王昶謨

唐四十三

貞和上塔銘

石橫廣四尺四寸高二尺三分  
三十行行十四字隸書在汝州

大唐開元寺故禪師貞和上塔銘

緱氏縣尉沈興宗墓

禪師諱貞茲郡京兆人也俗姓張氏自輪奐規唐紹躡  
蔚漢姜宋莫齒袁楊肯倫師泛浪知清依林擇茂將揮  
聖姓載願華宗年弱冠秀才登科知名太學已爲儒家



非正諱文字增妄想故去彼取此而爲上乘因亦旣口  
縉遂受衡陽止觀門居于洛陽白馬寺口不絕誦習心  
不離三昧口妙口之慧萌刺頓耶之濁種庶滅裂有我  
千盤無生焉後錄此郡開元寺又以爲喧者起之本靜  
者定之緣利緣舍起故復居此窟茨廡藥蔬之妙受谿  
篁颯擿之勝塵可略言矣前刺史故丞相齊公崔日用  
吏部尚書李昂皆頂奉山宇斯豈靈道歟然而口熊軾  
炬龍宮紆紫綬稽紆口口以揚凡庶之見聞兆昏蒙之  
口嚮口以開元十三年九月十八日口城于開元口舍  
春秋八十有四物慘煙雲哀纏黑白塗口鄼泣人到于

今僧第子宗本覺枝外茂口性內融三晉公侯旋師子  
夏伯嗜墳籍悉付仲宣痛微言之絕聆感星躔之易次  
遂爲銘曰

圓疑寂體兮邈彼真如口口無明兮儻若蘆廬慈梁過  
咽兮歲月其除松粟窅冥兮宛此幽居

開元貳拾陸年七月十五日第子宗本爲 亡和上  
敬造此塔

碑云禪師諱貞茲郡京兆人也京兆郡名上云茲郡  
者其義不可詳或唐以洛爲東都亦可稱京兆歟又  
云俗姓張氏自輪奐規唐貂蟬蔚漢姜宋莫南袁揚

前倫規唐猶云規晉姜宋蓋謂姜望宋微子袁揚蓋  
謂袁安揚震也又有前刺史故丞相齊公崔日用吏  
部尚書李昂皆頂奉山字云云按崔日用李昂劉昫  
唐書有傳貞禪師者駐錫風穴山嘗習衡陽三昧其  
化大行一夕溘然示寂守宰李昂闔維之得舍利千  
粒明皇謚爲七祖碑隸書甚劣惟用肯爲前卽苻字  
之省用已爲以尚有古意年號貳拾陸字用代二十  
六與五經文字九經字樣同餘碑少見

中州金石記

按碑云前刺史故丞相齊公崔日用吏部尚書李  
昂舊唐書崔日用傳中宗暴崩韋庶人稱制元宗

將圖義舉日用密詣藩邸潛謀翼戴及討平韋氏  
以功授銀青光祿大夫黃門侍郎叅知機務封齊  
國公爲相凡餘停知政事出爲荊州長史尋拜吏  
部尚書出爲常州刺史轉汝州刺史事在開元七  
年前新書同舊書李昂傳昂淮安王神通元孫開元  
初授汝州刺史拜工部尚書東都留守二十一年  
以金城公主在蕃充入吐蕃使奉使稱職轉兵部  
尚書不云其爲吏部惟新傳云以奉使有指再遷  
吏部與碑合蓋舊傳誤也

任城縣橋亭記

碑連額高八尺八寸廣三尺二寸五分二十行行四十一字隸書額題任城縣橋亭記六字篆書今在濟寧州學泮池東

### 橋亭記

將仕郎守尉游芳墓文

朝散郎行尉華容縣開國男瑯琊王子言書

唐再受命能事備於開元乃十有三季告成於僖

翠華之往也則北巡濟河

玉軼之旋也

則南指陳宋故

行宮御路次夫任城焉陽門橋

者跨泗之別流當魯之要衝初隨時以旣濟因

大駕而改功觀其壅川爲池因地設險削金堰於

馳道甃石門以飛橋交以朱欄揭以華表炳若星漢  
拖如虹蜺  
乘輿乃曰陽朝

御六龍胡萬騎聲明紀律文物比象週

睿覽於洲渚駐

天蹕於川梁先時望

君之來也則金繩以界之鐵鎖以扃  
之厥後樂  
君之顧也則浚池以廣之

築館以旌之經始茲宇惠而不費當儲峙之末有芻粟  
之餘散之則人獲壹錢鳩之則動以千計請爲亭館以  
壯橋池故鄉老老白於吏邑吏謀於府因人之欲得事  
之宜藝鼓不勝工力徒競構爲層構在水之陽壓鮮原

以迥出流古壙而却倚危欄巖二反宇峨峨勢搖煙渾  
岌若飛動南軒虛明以晃朗北室懿澹而清冷自堂徂  
亭遷迤幽徑上覆藤篠前臨芰荷憑高佇目萬象皆見  
夫河南之勝有三橋亭得其一梁園有梁王之迹圃田  
有僕射之陂平池曲榭美則美矣豈與夫島嶼開合林  
嶂蔽虧旁薄大荒吐納霞景畫橋南度像清洛之規虛  
館口臨叶滄洲之趣有是夫有是夫任風姓之國也詭  
俗古遠其太吳氏之遺人富而教之合於魯頌當

太平無事而朝野多歡不然者此池何以得化縣之  
名吾察何以得仙舟之目不其粹而時則有若 巨大

夫榮陽鄭公延葉信昭盈在道契虛舟禮樂之行仁德  
歸厚 丞范陽盧瓚 主簿平昌孟景 尉瑯琊王子  
言 尉河東裴迥皆士林英華學府金碧能於任公之  
節無廢會友之文 管授簡於芳以爲之記會芳有公車  
之召請俟於異時 金鄉尉潁川韓邠卿舍於裴氏言於  
衆曰游子之讓斯文以諸公在此諸公之意也子何辭  
焉因命秉燭俾芳操翰夜而成記翌日遂行開元廿六  
年秋七月旬有四日云

大唐開元廿有六年閏八月五日建

通直郎行方與縣尉王日雲篆額



口橋口劉遇 薛遂之

右橋亭記此唐碑之佳者趙氏金石錄載之予兩次  
撫搨附作釋文碑內軼音副乘音乘目卽以字反卽  
坂字廿音入俗讀念非至於空格多寡皆指君上及  
服御之類差等也可知唐時書碑之規制溯自開元  
至今已及千年雖幸未損亦漸漫漶當移列門下以  
蔽風雨庶不至剥落焉

濟寧州志  
附張昭跋

記文敘開元十三年告成於岱元宗紀十一月庚寅  
封於泰山是也其云翠華之往則北巡濟河玉軼之  
旋則南指陳宋唐時東巡途次猶可案指又云陽門

橋當魯之要術術卽遠二字古通用唐人碑文推崇  
本朝輒用空三格或跳行書之此碑獨叢雜有空三  
格四格六格七格十格不等莫詳爲何意

授堂金石跋

右碑後列銜各有尉河東裴迥唐書宰相世系表稱  
迥司封員外郎亦見地里志河南有伊水石堰天寶  
十年尹裴迥置卽其人也

山左金石志

按此碑今露立於濟寧州學泮池之東張氏謂當  
移列門下者指學宮戟門下可與漢魏五碑並列  
也今視戟門其地亦不能容欲加護惜當別籌位  
置之方矣橋亭記本非州學所有碑稱陽門橋者

跨泗之別流當魯之要術則此碑當立於陽門橋  
不知何年移來州學而濟寧州志又不載陽門橋  
無從攷其碑之所在碑云翠華之往北巡濟河玉  
獻之旋南指陳宋行宮御路次夫任城是時元宗  
登岱迴輦而南以道里言之當由曲阜滋陽一路  
南抵任城攷兗州府志泗水出泗水縣東五十里  
陪尾山西南經卞橋下又經其縣北又西過曲阜  
縣又西至府城東五里金口牖俗所謂黑風口也  
隋文帝時沂泗南流泛濫大野薛胄於二水之交  
積石堰之決令西注陂澤以溉良田號薛公豐堯

渠元至元二十年開會通河乃修薛公舊堰爲滾  
水石壩以引泗水入運河以意度之所謂二水之  
交卽碑云跨泗別流也陂澤溉田卽碑云壅川爲  
池也積石堰之決令西注卽碑云削金堰於馳道  
甃石門以飛橋也蓋隋時作堰至唐時收功而陽  
門橋當在兗州府城東五里金口疇宜濟寧州志  
所不收而事逾千年橋亭久廢故兗州府志亦不  
敘及也碑額稱任城者想在唐時任城疆域甚廣  
橋亭所在已屬任城境也碑中玉軌之軌廣韻特  
計切音地正韻度奈切音大未有音訓者張氏所

云恐誤也碑文王玉二字皆作正而州志釋文誤於玉軌之玉亦作王不知玉軌出離騷齊玉軌而並馳是也王軌則無出矣文中人獲壹錢之人字脫落旁注下文鄉老叠寫老字可見古人書碑之例不拘如此虛館下一字碑已磨泐張氏釋文作虛館壁臨今姑闕之不其粹而句義難曉粹字碑泐其大半而影迹猶存姑依張氏所釋錄之

元宗御注道德經

石約高一丈八尺八面而廣一尺七八寸不等前三面分三截上截額題太上皇元皇帝道德經及大唐開元神武皇帝注共十八字六行行三字正書次截注文三十行行七字下截經文各十一行行九十九

字四五六七三兩面皆十一行行一百十九字其法每  
經文一字皆雙行寫作四字後一而上截行六十字  
下截列各官姓名  
皆正書在易州

初昔在元聖強著盛言權輿貞宗啟迪來裔遺文誠在  
精義頗菲強其指歸雖蜀巖而猶病摘其章句自河公  
而或畧其餘浸微固不足數則我靈元妙旨豈其將墜  
朕誠寡薄嘗感斯文猥承有後之慶恐失無爲之理每  
因清宴輒叩鐸關隨所意得遂爲箋註豈成一家之說  
但備遺闕之文口茲絕筆是詢于口公卿臣庶道釋二  
門有能起予類於卜商鍼疾同於左氏灑於納善朕所  
虛懷苟副斯言必加厚賞且如諛神自聖季非此流懸

市相矜亦云小道既其不諱咸可直言勿爲來者所嗤以重朕之不德

開元廿年十二月十四日

經文附刻是書後不錄

開元廿六年歲次戊寅十月乙丑朔八日壬申奉

勅建

正議大夫使持節易州諸軍事守易州刺史兼高陽軍使賞紫金魚袋上柱國田仁晚奉 敕立

朝散大夫守易州別駕上柱國周憲

太中大夫行長史兼高陽軍副使上柱國鄭景宣

朝議大夫試司馬杜欽賢

道士染虛心 檢校上座解昇仙

明皇注老子經在城西開元觀乾道五年張孝祥移

于府治

天下輿地博記

右唐元宗注老子道德經開元二十三年用道門威儀司馬秀言令天下應修官齋等州皆於一大觀立石臺刊勒邢州故有龍興觀開元二十七年刺史李質立石墓勒如制至宋端拱初觀臺已廢沒知州軍事何續始修復之鐫記於臺左方余至邢州龍興觀已廢僅存半畝之宮先有尼居之前太守徐衍祚改



爲社學而石臺尙存隱於屋後人少知之者千年之  
物莫知愛惜計亦不能久矣

歸有光  
震川集

唐元宗註道德經諸文士共成之又是時古註俱存  
有古哲之源流而無後人之穿鑿五千言中得者十  
九卽本文未經濁亂其辭旣簡奧而義反精深其爲  
老聃之家嗣也無可疑矣于是徧諸區夏多有刻石  
而茲易水獨傳蘇靈芝之筆靈芝他書易中多有而  
不及此石之善

墨林  
快事

右明皇御注道德經歐陽公趙德甫所收者皆懷州  
本久不傳邢州本歸熙甫嘗見之今未嘗尙存否予

所收則易州本也懷州本經文仰書法則諸王所書  
此輻經注皆出於一手驗其筆迹蓋蘇靈芝書也石  
文間有殘缺亦有石本元缺者以注證之皆當與今  
本同

潛研堂金  
石文跋尾

碑首層列元宗二十年勅有隨所意得遂爲箋註云  
云分老子道經卷上德經卷下亦與古本相彷彿陸  
放翁題跋云晁以道謂王輔嗣老子曰道德經不析  
乎道德而上下之稱近於古今此本已久離析然則  
宋已失輔嗣定本今邢氏論語疏引老子德經云天  
網恢恢疎而不失此其可徵之一也然又考漢書註

如顏氏於魏豹傳引老子道經曰國家昏亂有忠臣  
田橫傳引老子德經曰貴以賤爲本高以下爲基是  
以侯王自謂孤寡不殺楚元王傳引老子德經云知  
足不辱嚴助傳老子所謂師之所處荆棘生之者也  
師古曰老子道經之言也楊雄傳貴知我者希師古  
曰老子德經云知我者希則我貴矣酷吏傳老氏稱  
上德不德是以有德下德不失德是以無德法令滋  
章盜賊多有師古曰老子道經之言也下士聞道大  
笑之師古曰老子道經之言也西域傳註老子德經  
曰天下有道却走馬以爲糞蓋其所引以道德分篇

者若此而與釋文題道經音義者並合又賈公彥周禮師氏疏亦以爲老子道經云道可道非常道其下案德經云上德不德是以有德章懷太子注後漢書其於翟醜傳也則又謂老子道經曰魚不可以脫於泉是數子於初唐時並同所證其真容碑稽之道經以慈爲寶其必襲自晉宋舊本如此碑所分題固有據也授堂金石跋

按史記老子列傳老子姓李名耳字伯陽諡曰聃爲周守藏室史西出關爲關令尹喜著書上下篇而去莫知其所終所謂上下篇卽世所傳道德經二篇唐以老子爲祖故尊崇之典特盛至元宗篤

好元學而老子之書尤行於世此碑首列勅文題  
開元廿年後列諸臣姓名題開元廿六年奉勅建  
攷舊唐書本紀開元二十一年正月制令士庶家  
藏老子一本每年貢舉人量減尚書論語兩條策  
加老子策封演聞見記亦云開元二十一年明皇  
親注老子道德經令學者習之則是時御注初成  
頒諸天下遍令士子傳習也唐六典載國學教授  
之法孝經論語老子皆爲大經注云老子用開元  
御注舊令用河上公注蓋當時選舉應制自開元  
以後無不用御注矣新書藝文志元宗注道德經

二卷又疏八卷天寶中加號元通道德經世不稱  
之道藏目錄載御製道德真經疏作六卷文獻通  
考又作一卷未知孰是道藏目錄又云御注八十  
一章分章逐句內則修身之本外則理國之方今  
碑但分上下篇而不標各章名目殆是書碑時從  
畧也碑上卷題老子道經下卷題老子德經與經  
典釋文所題正同攷唐代傳注中引老子語皆道  
德分見未嘗混而爲一則元宗所注實從古本如  
此董道藏書志謂元宗注成始改定章句爲道德  
經凡言道者類之上卷言德者類之下卷非也元

宗之注道藏尙存其書刊於前明正統十年而傳刻謾誤文句或多增減獨石刻千古不易最爲可據昶所見道德經注無慮數十家皆與河上公王弼諸注及元宗本大同小異而唐太史令傅奕校定老子古本字句獨較他本爲繁亦足以資參訂當開元時此碑傳刻頗多集古金石二錄所載皆懷州本久已無傳歸有光跋邢州龍興觀本稱開元二十七年所刻則立石已在易州之後今亦未見然雋茲老子攷異嘗引龍興碑疑卽邢州本也雖無全文可攷而單辭隻字尙可概見全碑面目

又元至元中高翹所書古老子并釋文刻於石碑  
今在盤屋驗其文與諸家亦多不同今合各本及  
釋文所載詳勘異同畧舉其概足證此刻之善者  
如第二章

原碑不標第一第二字樣今揣其  
文從台本所分載入便檢核也

故有

無相生難易相成長短相形高下相傾音聲相和  
前後相隨六句河上公傳奕至元本相字上皆有  
之字李道純曰此間有之字者非也王弼頤歡與  
此同萬物作而不辭河上公王弼而上有焉字陸  
希聲至元本及太平御覽引並與此同邢州本作  
萬物作而不爲始同傳奕本也第四章湛常存吾



不知誰子上句諸本及至元本作湛兮似常存邢  
州本作湛似或存下句諸本誰下有之字惟陳象  
古至元本與此同第五章其替素篤諸本及至元  
本句末有乎字惟李約與此同多言數窮諸本並  
同邢州本言作閏第七章天長地久地所以能長  
且久者諸本並同邢州本上句作天地長久下句  
無且字故能長生諸本並同邢州本生作久非以  
其無私王弼至元本及淮南子引句末並有乎字  
河上公與此同并無非字第八章又不爭處河上  
公王弼又作而司馬光曹道冲至元本並與此同

第九章不可長保諸本並同邢州本保作寶富貴  
而憍諸本憍皆作驕惟司馬光至元本與此同功  
成名遂身退諸本並同惟王弼作功遂身退傅奕  
作成名功遂身退邢州本又作名成功遂身退第  
十章載營魄抱一能無離專氣致柔能嬰兒滌除  
元覽能無疵愛民治國能無爲天門開闔能爲雌  
明白四達能無知傅奕及淮南子引六句末並有  
乎字李道純曰有乎字者非也能無爲能無知王  
弼作能無知能無爲傅奕作能無以知乎能無以  
爲乎河上公至元本與此同第十三章何謂寵辱

寵爲下河上公作何謂寵辱辱爲下王弼傳奕作  
何謂寵辱若驚寵爲下陳景元李道純作何謂寵  
辱若驚寵爲上辱爲下惟至元本與此同故貴以  
身爲天下若可寄天下愛以身爲天下若可託天  
下諸本爲天下下皆有者字陸希聲至元本及淮  
南子引與此同若可二句河上公作則可以寄於  
天下乃可以託於天下王弼作若可以寄於天下  
若可托天下淮南子引作則可寄於天下乃可托  
於天下矣傳奕又作則可以託天下矣則可以寄  
天下矣惟陸希聲至元本與此同第十四章是謂

忽恍諸本並同邢州本無此句第十五章豫若冬  
涉川河上公豫作與下有兮字王弼豫下有焉字  
傅奕亦有兮字猶若畏四隣諸本猶下亦有兮字  
陸希聲至元本二句並與此同儼若客河上公作  
儼兮其若客王弼作儼兮其若容案客字與下文  
釋樸谷濁四字爲韻作容者非也渙若冰將釋河  
上公王弼渙下有兮字冰下有之字邢州本釋作  
洧傅奕至元本二句並與此同敦若樸曠若谷渾  
若濁諸本及至元本並作敦兮其若樸曠兮其若  
谷渾兮其若濁邢州本作混若樸曠若谷混若濁

句法與此同敦作混疑涉下文而誤孰能濁以靜  
之徐清河上公靜上有止字傅奕靜上有激字之  
下有而字陳景元靜上亦有激字王弼陸希聲至  
元本並與此同故能弊不新成河上公王弼弊作  
蔽傅奕作是以能敝而不成邢州本作故能敝復  
成惟至元本與此同第十六章各歸其根河上公  
王弼至元本並作各復歸其根莊子作各復其根  
惟傅奕與此同公乃王王乃天諸本並同邢州本  
作公能生生能天第十七章其次親之譽之其次  
畏之侮之上句河上公王弼作其次親而譽之傅

奕作其次親之其次譽之下句陳象古作其次畏  
而侮之傳奕作其次畏之其次侮之陸希聲至元  
本二句並與此同猶其貴言河上公王弼作猶兮  
其貴言陸希聲作猶其貴言哉傳奕作猶兮其貴  
言哉邢州本無兮哉二字猶其作其猶惟至元本  
與此同第二十章荒其未央河上公王弼作荒兮  
其未央哉傳奕至元本作荒兮其未央邢州本作  
莽其未央案莽字疑卽荒字之誤與此同也如春  
登臺王弼顧歡至元本並與此同諸本或作如登  
春臺者皆非也我獨怕其未央河上公作我獨怕

兮其未兆王弼作我獨廓兮其未兆傅奕作我獨  
魄兮其未兆邢州本作我魄未兆惟至元本與此  
同乘乘無所歸王弼作儻儻兮若無所歸陸希聲  
作儻儻兮若不足以無歸傅奕作儻儻兮其不足  
以無所歸河上公至元本作乘乘兮若無所歸與  
此同惟多兮若二字畢制府沉道德經考異云說  
文儻相敗也讀若雷儻垂貌一曰嬾解乘覆也三  
義皆相近其聲之轉則猶乃之讀爲仍散之讀爲  
止矣我愚人之心純純諸本心下有也哉二字純  
純下有兮字王弼傅奕純並作沌邢州本亦作純

純兮忽若晦嚴遵忽下有兮字河上公作忽兮若

海王弼作澹兮其若海叙兮似無所止河上公叙

作淵

今河上公本作源

王弼作颺梁簡文傳奕並作飄惟

至元本二條並與此同案叙卽應宋之宋王弼作

颺此作叙二字形殊義同而貴求食於母河上公

王弼傳奕作而貴食母陳象古邵若愚至元本並

與此同老子考異引開元本亦作求食於母文獻

通考載晁公武云元宗老子注頗增其詞如而貴

食母作兒貴求食於母之類貴食母者嬰兒未孩

之義諸侯之妻以大夫妻爲食母增之贅矣今案



此句注但云求食於母者貴如嬰兒無營欲爾故

上文云如嬰兒之未孩先無口

疑求字

於二字今所

加也云云則元宗但增求於二字實未改而爲兒

晁氏所譏未爲盡確或別本如此未可知也第二

十一章忽兮恍其中有象恍兮忽其中有物諸本

忽兮恍恍兮忽兩句之下多有兮字額歡作忽恍

中有象恍忽中有物河上公又作恍兮忽兮其中

有物忽兮恍兮其中有象二句互倒非也至元本

與此同窈兮冥其中有精河上公王弼作窈兮冥

兮其中有精額歡作窈冥其中有精文選注引與此

同至元本竊作杳其精甚真諸本並同邢州本無  
此句第二十二章枉則直傅奕及邢州本直作正  
河上公王弼與此同弊則新王弼弊作蔽傅奕作  
敵河上公至元本與此同第二十五章寂兮寥兮  
鍾會寥作颺王弼傅奕作冥河上公至元本與此  
同第二十六章燕處超然王弼傅奕作宴輕則  
失臣王弼傅奕及邢州本臣並作本河上公至元  
本二條並與此同第二十七章善計不用籌算河  
上公作善計者不用籌策王弼作善數不用籌策  
傅奕作善數者無籌策陸希聲呂惠卿並作善數

者無籌算陳象古作善計無籌筭惟至元本與此  
同第二十九章或呵或吹王弼响作獻諸本响皆  
作噤或載或墜王弼載作挫傅奕作培邢州本作  
榜河上公至元本二條並與此同第三十章大軍  
之後必有凶年諸本並同邢州本無此二句果而  
勿憍諸本橋皆作駱陸希聲至元本與此同是謂  
不道不道早已傳奕及邢州本兩不字皆作非河  
上公王弼至元本並與此同後第五十五章亦有是謂不道不道早已  
二語諸本皆同第三十一章不可得志於天下諸  
邢州本亦作非本作則不可以得志於天下矣傅奕無則字邢州

本作不可得意於天下惟至元本與此同第三十  
二章人莫之令而自均諸本人皆作民惟永樂大  
典所載王弼本及至元本與此同第三十三章死  
而不亡者壽諸本亡皆作忘河上公作妄傳寫之  
誤至元本與此同第三十四章大道汎其可左右  
河上公王弼並作大道汎兮釋文云本或作汎周  
張並同傅奕作大道汎汎兮其可左右至元本亦  
作大道汎兮功成不名有愛養萬物而不爲主上  
句成字下河上公王弼有而字傅奕作功成而不  
居邢州本至元本並與此同下句愛養王弼作衣

養傳奕作衣被河上公至元本與此同第三十五  
章道之出口傳奕及邢州本口作言河上公王弼  
至元本並與此同第三十六章柔弱勝剛強傳奕  
作柔之勝剛弱之勝彊河上公王弼至元本並與  
此同第三十八章處其厚不處其薄居其實不居  
其華河上公王弼處其居其並作處不處不居並  
作居傳奕兩處兩居統作居至元本及朱穆崇厚  
論引並與此同第三十九章其致之諸本句下並  
多一也二字惟河上公至元本與此同第四十一  
章上士聞道勤而行河上公王弼至元本行下有

之字傳奕又作而勤行之第四十二章人之所教  
亦我義教之河上公王弼作人之所教我亦教之  
傳奕作人之所以教我亦我之所以教人惟至元  
本與此同第四十三章無有入有問河上公至元  
本入下有於字傳奕作出於無有入於無問惟王  
弼與此同第四十五章清靜爲天下正河上公句  
上有知字傳奕知清靜下并有以字王弼李約薛  
致元至元本並與此同第四十九章慤慤爲天下  
渾其心王弼慤慤作欸欸釋文云一本作慤河上  
本作淡淡簡文云河上本本作怵怵至元本與此同

第五十一章是以聖人莫不尊道而貴德道之尊德之貴夫莫之爵而常自然諸本上句聖人皆作萬物下句爵字河上公王弼作命傳奕陸希聲至元本二句並與此同第五十四章修之家其德能有餘諸本皆作其德乃餘惟韓非子作其德有餘第五十七章我無事而民自富我好靜而民自正諸本無事句並在好靜句之下惟至元本與此同第六十一章大國者下流天下之交天下之交牝常以靜勝牡以靜爲下河上公王弼作大國者下流天下之交天下之牝牝常以靜勝牡以靜爲下

傳奕作大國者天下之下流天下之交天下之牝  
牝常以靖勝牡以其靖故爲下也至元本作大國  
者下流天下之交天下之交牝牝常以靜勝牡以  
靜能下惟陸希聲陳象古與此同故大國以下小  
國則取小國小國以下大國則聚大國故或下以  
取或下而聚諸本兩聚字亦作取惟河上公本或  
作聚與此同第六十三章是以聖人由難之諸本  
由皆作猶二字古通用第六十五章知此兩者亦  
稽式王弼稽作稽傳奕作常知此兩者亦稽式也  
河上公至元本與此同第六十六章是以處上而



人不重處前而人不害河上公作是以聖人處民  
上而不重處民前而不害傳奕作是以聖人處之  
上而民弗重處之前而民不害也惟至元本與此  
同王弼人作民餘與此同第六十七章保而持之  
河上公王弼作持而保之陸希聲至元本與此同  
第六十八章善勝敵者不爭河上公作不與爭王  
弼作不與無爭字傳奕至元本與此同第七十三  
章繹然而善謀河上公繹作埤梁武王尙鍾會孫  
登張嗣作坦傳奕作默王弼至元本與此同第七  
十六章木強則共王弼傳奕共作兵河上公至元

本與此同第八十章雞犬之音相聞諸本音皆作  
聲惟至元本與此同以上諸條皆石本異文而通  
攷東家率多吻合知當時撰注時大率參採舊說  
擇善而從成此定本也然經注旣繁寫刻時豈能  
細檢則亦有石刻謬脫不可爲訓者如第二十四  
章自是不彰自伐無功自矜不長三句諸本自是  
自伐自矜下皆有者字與上文跋者不立踳者不  
行自見者無功句法相類碑脫三者字第三十章  
不以兵彊天下其事諸本其事下皆有好還二字  
案注云抗兵加彼彼必應之其事旣好還報則勝

負之數未可量明原本亦有此二字碑脫也用之  
不可諸本此句皆作用之不可既王弼作用之不  
足既碑脫既字第三十五章貴以賤爲本高以下  
基按二語句法相配碑脫下句爲字諸本有之故  
致數與無與河上公作故致數車無車王弼傳奕  
本車皆作譽今彌本亦作與至元本皆作與碑下作與上  
作與誤注云數與則無與與字亦誤而公王以爲稱諸本並作  
王公以爲稱傳奕作而王侯以自稱也玩法文原  
本亦當作王公碑二字誤倒第四十三章吾是以  
知無爲之有益益傳奕及淮南子引皆作吾是以

知無爲之有益也河上公王弼並無也字碑下谷  
字非譌卽衍第四十九章善者吾善之不善者吾  
亦善之德善者吾信之不信者吾亦信之德信諸  
本第二句皆讀善字絕句第三句作信者吾信之  
碑脫上信字第五十五章懼鳥不搏諸本懼皆作  
攫碑作懼不成字第五十八章廉而不穢諸本穢  
皆作澗惟河上公作善碑作穢說文所無第五十  
九章是謂深根故蒔諸本故皆作固誤第六十六  
章故天下與能與之爭諸本上與字皆作莫碑誤  
第七十章知我者貴河上公王弼至元本並作知

我者希則我者貴傳奕作知我者稀則我貴家注  
 云了知我忘知之意者希少法則我不言之教者  
 至貴則原本當同河上等本碑脫希則我者四字  
 凡此皆宜參据衆家以正刊誤者也碑末題田仁  
 瑰周憲鄭景宜杜欽賢諸臣姓名皆同時奉教建  
 立之人而不書臣字亦例之變者此四人兩唐書  
 皆無傳可攷仁瑰字正勤官至安西都護其事蹟  
 畧見保定府德政碑碑載仁瑰以開元二十五年  
 除易州刺史兼高陽軍事悉與此碑合惟此題作  
 仁瑰雙名德政碑且云名瑰為異耳碑無書人姓

名相傳是蘇靈芝所作靈芝兩書亦無傳墨池編稱其好書石蹟宜和書譜載靈芝嘗爲易州刺史郭明肅書候臺記在幽燕之地中州患難得契丹以墨本詩權場易絹十端方與一本蓋開寶間書名極盛故爲時所重如此今世石蹟存者昶所藏有開元二十七年易州鐵像頌二十八年田公德政二碑此碑筆法極與相似當爲靈芝所書無疑矣書譜云靈芝儒生也而鐵像頌題登仕郎前行易州錄事德政碑則題爲逸士豈罷官之後乃有此稱書譜因之誤爲儒生耶金石錄載靈芝書范

陽郡憫忠寺寶塔頌題承奉郎守經畧軍曹參軍  
其碑立於至德二載則肅宗時又起爲參軍也

易州鐵像頌

碑高九尺六寸七分廣四尺八寸四分  
分十八行行三十六字行書在易州

大唐易州鐵像碑頌

并序

崇文館校書郎王端撰

登仕郎前行易州錄事蘇盛芝書

自我大師堅林示化不有像設人何以依小大之功蓋  
存乎願瞻彼朔易有大像焉厥高羌而不可乎彌度則  
我前太守盧君之所立盧君諱暉字子晃自尚書

即保藩我郡張皇軍容飭而明慧而肅害必革利必興  
爰徙軍爰置邑初闢闢飾招提遠者懷近者悅戈甲以  
理奪虜氣於塞外童耄以樂被毗諸於域中然猶躬行  
屬縣求人之瘼相彼村園古多精舍往往陞陔而法鼓  
存焉或楮或柞或櫛或震莫賄荀儀之狀寧聞宮徵之  
音 君曰咨時則有若黃考鮐背之老數百人隨車  
而請曰惟是歛冬之金委於草莽不敢散爲凡器以速  
戾實願合爲真容以祈禱 君曰善且俾五臺沙門  
大端慮事樂施之力一惟百精誠之心百惟一炭嶺屬  
爐谷呀人雲屯囊雷動黃白之氣竭青氣生焉於是化



天下之至剛爲天下之至柔以至柔入無間亦旣成像  
復歸於剛欲奔走而觀之則三十二相備矣計功者蓋  
莫知其虛竄徒駭其不日而成也度財者又莫知其少  
多徒歎其不召而至也非我人心之歸於君君慧之及  
於人何以能之是舉也可以觀政矣問一歲使臣以君  
政尤異聞於 帝帝用嘉之錫以束帛有由然也伊  
追琢之功未旣而惠慮君遷于巖田君至自靈誕敷至  
化續戎前功屬朗景彰飾道盡矣戊寅歲易人思邵父  
美杜母嘉願力謀不朽是用託頌於端端文館之吏也  
敢不肅若頌曰

崇崇辟容法之尊兮優優庶政直而溫兮如茨如陵不  
驚不崩福永存兮

午建  
大唐開元二十七年歲次己卯五月壬辰朔三日甲

□□□通車道三所官坐鎮 白楊谷 置縣三 五週

樓亭 板坊 每驛傍造店一百間 抱陽寺造長

廊一百卅間 □□□營入城造廳及廊宇二百間

造水碾四所 已上並盧君造 鑿人王希貞解崇光

右易州鐵像頌碑末云置縣三五迴樓亭板城攷元

和郡縣志五迴縣開元二十三年刺史盧暉奏置在

五迴山東麓因名之二十四年刺史田琬以其險隘  
東遷于五公城在今易縣西五十里樓亭板城二縣  
元和志不載蓋天寶後縣已省也元和志又云高陽  
軍在州城內開元二十年置蓋亦盧暉所奏矣唐書  
地理志瀛州有長豐渠開元二十五年刺史盧暉自  
東城平舒引滹沱東入淇通漕溉田五百餘頃魏州  
有西渠開元二十八年刺史盧暉徙永濟渠自石灰  
窠引流至城西注魏橋以通江淮之貨然則盧君固  
當時之能吏所至皆以興建爲務者矣

潞州堂金  
石文成尾

易州太守盧君暉造鐵像郡人張皇其事勸爲頌暉

見唐書宰相世系 官太原少尹者當卽其人碑後  
載盧石開北山通車道三所有官坐鎮白楊谷義院  
諸名以韋濟開偃師東山下新道例之碑亦宜附入  
地里志而史文不及豈有所遺耶暉又置縣三日五  
週曰樓亭曰板城地里志五回開元二十三年析易  
置并置樓亭板城以碑案之首發議建置者自盧君  
始也

授堂金  
石跡

記石浮屠後

石橫廣二尺六寸七分高一尺三寸八分二十  
一行行十二字至十四字不等正書在房山縣

大唐開元十八年金仙長公主爲奏 聖上賜大唐

新舊譯經四千餘卷充幽府范陽縣爲石經本又奏范陽縣東南五十里上城村趙襄子淀中麥田疰并果園一所及環山林麓東接房南嶺南通他山西止白帶山口北限大山分水界並永充供給山門所用又委禪師元法歲歲通轉一切經上筵 寶曆永福慈王下引懷生同攀覺樹塢開元廿八年庚辰歲朱明八日前莫州吏部常選王守泰記山嶺石浮屠後

送經京崇福寺沙門智昇

檢校送經臨壇大德沙門秀璋

都檢校禪師沙門元法

同前係

獨樹村 磨碑寺

東至到 南至河

西至河 北至他山

四至分明永泰無窮

今在房山縣記金仙公主奏賜譯經四千餘卷并范陽縣東南五十里上城村趙襄子淀中麥田莊并果園一所及環山林麓

金石文  
字記

按前云開元十八年金仙長公主爲奏聖上云云  
唐書公主傳睿宗第九女金仙公主始封西城縣

主景雲初進封太極元年與玉真公主皆爲道士  
以方士史崇元爲師當開元時公主旣爲道士未  
嘗進封長公主此稱長公主後又有御書神道碑  
亦稱長公主蓋皆以元宗之妹而尊稱也疆域之  
分四至八到始見於元和郡縣志繼見於太平寰  
宇記後之撰地志者皆因之此以寺記而後列東  
西南北云四至分明後人田宅署券亦同此式蓋  
昉于此也刻記之所碑無山寺主名但云石浮屠  
後又云環山林麓西止白帶山口而文前云賜大  
唐新舊譯經四千餘卷爲石經本攷畿輔通志山

川卷內有石經山在房山縣西南五十里引隋圖  
經云智泉寺僧琬見白帶山有石室遂發心書經  
十二部刊石爲碑又引逃虛子集云石經貯于巖  
洞者七地穴者二洞以石門閉之穴以浮圖鎮之  
又引帝京景物畧云房山縣西南有山曰白帶山  
生懋題草又曰懋題山藏石經者千年故曰石經  
山北齊南嶽慧思大師發願刻石藏座下靜琬承  
師囑自隋大業迄唐貞觀大涅槃經成其夜山吼  
生香樹三十餘本六月水浮大木千株至山下搆  
雲居寺焉唐金仙公主修之山上雷音洞高丈餘



四壁刻經又仙釋卷內載釋靜琬訪求名勝至白帶山見峯巒靈秀遂採石造十二部石經因構雲居寺明皇第八妹金仙公主增修之又寺觀卷內載雲居寺在房山縣石經山下寺有唐開元十年石浮圖銘二十八年當云十八年山頂石浮圖後記今並存南麓卽西天寺塔下有石經窟其後則香樹林據此知此碑在房山縣石經山雲居寺也金仙公主本睿宗第九女而云明皇第八妹者安興昭懷公主早薨不在數內也碑云奏賜譯經充幽州范陽縣爲石經本者今之房山縣在唐時爲良鄉

縣屬幽州而碑云幽州范陽縣卽今之涿州隋時  
爲涿縣屬涿郡武德七年改范陽縣爲涿州治並  
唐書地理志良鄉范陽兩縣接壤想當開元時白帶山  
在范陽境而范陽又屬幽州唐志所未晰也

### 易州田公德政碑

碑高九尺八寸五分廣四尺九寸二十九  
行行六十字行書在保定府蓮池書院

大唐正議大夫使持節易州諸軍事守易州刺史兼高  
陽軍使賞紫金魚袋上柱國田公德政之碑 并序

大中大夫守中書侍郎集賢院學士上柱國東海縣  
開國男徐安貞撰

逸士武功蘇靈芝書

聞之經國濟理長物生人者則必委成郡邑而擇其良吏然守文則溺於牽俗更法則弊於專任寬恕則失於容奸強毅則陷於傷善建用皇極難乎其人若夫剛不爲虐簡而能斷布政優優化人成俗者見於田易州焉公名琬字正勤其先敬仲適齊曰陳爲族周齊聲近遂氏於田五代其昌罷秦人之西帝七雄方闢朝泗上之諸侯自國滅淄上族遷關右武安以威屬爲丞相司農以建議封陽城吾能言之公其後也不殊厥問幽而復光曾祖君舒隨甘州刺史祖越西州長史父思成州同

谷尉名雖必聞官不求達累濟純嘏克生忠良公應天  
景星含道元氣和五味以正性備百行以資身况言談  
者仁之文孝悌者德之本取與者事之會恬淡者道之  
持弱冠遊太學尋師授韓詩曲禮以爲小雅傷於怨刺  
大戴失於奢侈功業宜先於濟理章句非口於適時因  
讀孫吳兵法衛霍別傳遂杖劍從軍以功授合黎府別  
將歷果毅轉折衝累拜耶將中郎將尋除安北都護口  
遷威衛將軍每拜命必銜一官兼一使口口幹理口克  
保釐口是所向皆通取善咸集戶部尙書王峻國之楨  
幹人之具瞻太子太師蕭嵩惟嶽出雲生甫翊聖王之

惣管朔方也帳下之畫一以詢公蕭之節度河口也聞  
外之事不裁於己公貌無矜色口無伐辭出則推美於  
人入則盡慮於事議者以爲王能信善蕭能任賢居二  
者之間非周才就可尋以將軍兼靈州口口朔方軍節  
度副使押渾部落仍檢校豐安定遠及十將兵馬使會  
遭家艱奔喪州里扶杖未起粥口不入古之純孝何以  
尚茲明年抹胡綬邊 口口震怒起公除易州判  
史鎮北邊也公聞命驚殞以死讓請情旣難奪 恩  
爲中停廿四年禮終復除易州刺史兼高陽軍使此邦  
之人舊稱勇悍愼然尚荆卿之風慕燕丹之義其俗易

使也其人可用也而地接邊鄙郡叅軍鎮口口杼軸空  
矣征假勤矣用非口養力盡猶求摧節義之明心就逋  
逃之口口公深口口口大返其源阜其財求致其忠愛  
居者既逸去者知歸星歲未周襁負咸至豈非寬明以  
恕恩結其心者歟時出桑野奄觀銓刈責其墮者則爲  
之怛感口口口敗子焉勉其勤者則喜形顏色若遇其  
良子焉故人感而懷之莫敢暇逸霑體口足唯農是口  
所以家粟流行而餘糧棲畝管子曰倉廩實知禮節則  
公口口政信然也歲或大旱憂心如熏如燠如焚如焚  
其身曾是勤人達于鬼神及有事山川宜乎口土祝始

告而雲合俎未徹而雨降氣有并□災變爲□□□東風至雨集其高也散日其下也被地遂能辯其疆界犬牙不入非神鑒其德有所虛之其孰能與於此夫市者利之所聚人之所爭強□肆奔不息□□取於人謂爲官市交易不得其所朝夕爲之皆虛公撫御多方非止朴罰家僮門客莫□城寺通商服佔日以填湊更爲一都之會也公□□將□□□其有酣歌劍舞者彈弦跼屣者攝其雄而息其競疏其穢而復于禮以爲不積其德無以□□也不正其身無以出令也故視無旋聽無徯其動也可□其靜也可法四隣以是嘉其

致而歸其高百姓以是服其德而樂其行故自郡邑至  
乎鄉鄙莫不競者讓暴者仁毅者溫懦者立其惟不言  
而化口過半矣於是詢耆舊察人俗入而靜謀出而周  
視高者抑之弛者張之人之所惡者去之人之所欲者  
濟之老有歸幼有長至於疾苦莫不躬親爲之一口而  
口無艱急而亦無殍病矣比及三年則有成也盡知方  
也洎農隙巡撫煦愉溫顏易水變其寒風燕谷增其暖  
氣由是刑罰不用而口亦恥之使無訟口見於今日矣  
故化行乎近郡而譽達乎京師公夙昭武烈而善於文  
史將以漢主憂邊故投其筆硯晉侯擇帥更悅其詩書



不然何有執繁弱之弓杖雍狐之戟而能綠飾吏事撻  
發如神窮物之理盡人之性若此之至也廿七年公次  
會計朝于京師廿八年春二月 制攝御史中丞遷  
安西都護 詔書至郡郡之人吏若有所亡或踰門  
衢或悲里室曰自我公至吾黨其蘇今我公往吾黨其  
痛詣 闕陳情則長安地遠邀道攀戀而西域路絕  
既借履不可則令名宜存詞曰

卓尔有立時惟田侯清標遠暎高月垂秋其武也剛其  
文則柔孰是師旅能牧于州靡不夙夜思皇厥中綢繆  
庶政亦以訓戎 天子曰俞爰嘉尔功俾守易土而

和其風北燕之南全趙之北歲有軍事人用不足從而  
搖之是謂苛慝惟君莅止高明柔克柔克伊何撫如獲  
孩躄不入境旱不爲災旣庶能富逋亡歸來非德之致  
其誰有哉水積則流德積則揚化自下國聲馳遐方允  
矣君子如珪如璋刻石頌之令問不忘

開元廿八年十月十六日建 太原王希貞刻

此蘇靈芝書靈芝武功人生開元天寶間書與胡霈  
然齊名今霈然書不可見見此碑可以得其概矣

石  
華鑄

田琬以開元二十四年治州有善政二十八年遷攝

御史中丞安西都護以去州人立石頌之碑云公名  
琬字正勤而趙氏金石錄鄭氏金石畧于氏天下金  
石志竝題作田仁琬德政碑今易州龍興觀石刻道  
德經末亦題刺史田仁琬各元和郡縣志又書易州  
刺史田琬碑刻立於當時稱名必無差誤不知何以  
異同若此也唐會要凡授都督刺史階未及五品者  
竝聽著緋佩魚離任則停之若在軍賞緋紫金袋者  
在軍則服之不在軍不在服限琬階正議大夫正四  
品上其結銜稱賞紫金魚袋蓋以軍功得之與賜紫  
借紫者有別矣唐六典諸軍各置使一人其橫海高

陽唐興恒陽北平五軍皆本州刺史爲使又會要高  
陽軍本在瀛州開元二十年移在易州故琬以易州  
刺史兼高陽軍使也合黎軍府之名唐書地理志失  
載不知屬何州也琬嘗爲靈州刺史朔方軍節度副  
使押渾部落仍檢校豐安定遠及十將兵馬使攷之  
於史吐谷渾部落初自涼州徙鄯州不安其居復於  
靈州之故鳴沙縣置安樂州以居之又靈州黃河外  
有豐安安遠新昌諸軍安遠蓋定遠之譌故朔方節  
度得兼押渾部落使領豐安安遠二軍也十將兵馬

使史無文以證之

潛研堂金石文跋尾

田琬字正勤開元二十四年除易州刺史碑盛述其  
爲政有惠爲州人所樂而推其先世云敬仲適齊因  
陳爲族周齊聲近遂氏於田新書宰相世系表陳田  
聲相近與此符合史記田敬仲世家以陳字爲田氏  
索隱曰據史此文敬仲奔齊以陳田二字聲相近遂  
爲田氏然則陳田聲近蓋由舊說也荀子不苟篇田  
仲注曰仲齊人處於陵孟子作陳仲史記游俠傳東  
陽田君孺索隱曰漢書作陳君孺皆可取以附證此  
碑之所依據又碑稱戶部尙書王峻太子太師蕭嵩  
案峻與嵩並見唐書本傳稱官與碑合

授堂金  
石跋

按此碑徐安貞撰文題大中大夫守中書侍郎集  
賢院學士上柱國東海縣開國男舊唐書傳安貞  
信安龍邱人開元中爲中書舍人集賢院學士上  
每屬文作手詔多命安貞視草累遷中書侍郎新  
書傳云徐楚璧終中書侍郎東海縣子在中書省  
久是時李林甫用事或言計議多所叅助後更名  
安貞今碑作東海縣男與新史異餘官與兩史同  
書譜引金華志云徐楚璧字子珍唐詩紀事云安  
貞以李林甫用事逃隱衡嶽爲掇菘行者病啞不  
言數年後因修建佛殿僧中選善書者題其梁徐

行者跨梁而過掌事人怒杖其背徐以手畫地曰  
昔年曾學大書願試書及題數行羣僧皆悅服因  
遣盡書之後李邕過寺見其題大驚召之同載而  
歸按此語多不確唐書宰相世系表林甫官吏部  
尚書在開元二十七年其用事時安貞傳方言其  
叅助計議何至逃隱衡嶽李邕自開元初左遷括  
州司馬起陳州刺史十三年復貶遵化尉徙澧州  
司馬二十三年起爲括州刺史後歷淄濶二州刺  
史出爲汲郡北海太守邕嘗書麓山寺碑在開元  
十八年如果安貞有逃隱衡嶽題梁爲邕所見同

載而歸之事亦當在開元十八年前後而其時林甫正未用事也大抵舊說流傳率多差誤年湮事遠無人考稽相率而承訛襲謬者類如此也碑已題安貞則傳云後改名安貞者在二十八年已前矣田陳二姓諸說皆謂聲相近按詩周頌有瞽篇應田縣鼓鄭箋云田當作幘音允聲轉字誤變而爲田竊疑幘可變爲田亦可變爲陳幘與陳先以形似而變陳與田又以聲近而譌也附識以備一說



金石萃編卷八十三終